



PHALTLALATSO EA LITABA

(*LA Phuptjane, 18, 2018*)

‘Muso o hlokometse ka masoabi le ngongoreho bohloko ba Sechaba mabapi le se bonahalang e le boikhohomoso ba Bahlanka ba Baholo ba hlahang kapel’a Litsi tsa Bolisa ba litaba tsa Sechaba, tse akhang Likomiti tsa Paramente le Likomisi tse Ikemetseng. Ba bang ba ikokomosa ka ho iphetola bo-tlhalentlhajana ba “rutang” Likomiti le Likomisi tsa Bolisa mosebetsi le melao ea tsona, le ho fetela ho hlaheng ka lithunya kapel’a tsona, ho kharumela ka bonkoapo keletso, tataiso, le khalemo tseo ba li fuoang ke ba lokelang.

Sena se fihletse sehlohlolo moo ho bileng hoa bitsoa Sepolesa ho namola ha balebeli ba Mookameli oa Litsi tsa Tlhabollo ea Bats’oaruoa ba neng ba hlometse ka mokhoa o ts’osang ba neng ba hana taelo ea ho tsoa tulong eo Monamoli a ntseng a etsa lipatlisiso mabapi le ho phahamisa maemong a ts’ebetso hoa basebetsi ba lefapha ka mokhoa o belaetsang ba bang; moo Monamoli a bileng a ipeha tlas’a khoboso ea ho sechoa ‘moho le bohle e le hore ts’ebetso eo e tsoele pele.

Tsena li etsoa ke batho ba tsoetsoeng, ba holisoa le ho rutoa ka thata ke Sechaba sena sa Basotho, ho ba otlala hore ba be le tsebo le kutloisiso litabeng tsa tsamaiso, molemo oa hlomphano le boikokobetso, ho hlabolla le ho sokolla ba khelohang tseleng ea botle. Ho ts’osang le ho feta ke ha litaba tsena tse makatsang li bapisoa le lihloho tsa liketsahalo tsa masole a neng a kena kahar’a Makhotla a hlometse ka mekotokoto ea lithunya tsa ntoa, a ikoahetse lifahleho, ba qhoba ka boikhohomoso bomphato’a bona ba holehiloeng ka liketane kamor’a ho koetloa le ho sotlakoa hobane feela ba belaelloa ho ikobela puso ea molao; ‘me ba bang har’a Sechaba ba bonts’a hore Puso ena e ts’oana le eo ea Faro e senotsoeng ke Komisi ea Machaba ea SADC ea Moahlompehi Moahloli Justice Mpaphi Phumaphi!

Puso ena e khethiloe tlas’a leru le lets’o la ho hlompholla lits’iea tsohle tsa se khethollang motho ho phoofolo e hlaha, ka tlhompho ho litsi tsa bolisa tse reretsoeng ho ruta batho ho sielana sebaka, ho ikobela litumellano tsa selekane sa phelisano-‘moho, ho tloha ka Molao oa

Motheo le melao e o ts'ehelitseng, le ho arolelana ka nepo tseo ba hlohonolofalitsoeng ka tsona ke Molimo le Tlholeho. 'Muso ha o na ho shebella ha Naha ena e khulisetsoa mehleng ea malimo tlas'a bolisa ba eona. Puso e hlokomelisa bahlanka bohle hore ha e na ho mamella tlontlollo le tello ea Litsi tsa Bolisa litabeng tsa Sechaba, le ho fetola Naha sets'euoa mahlong a Machaba. Bohle ba ikobele kano ea bona ea ho apara lebitso la Sechaba sena ka hlomphe, boitlhompho le boikokobetso; 'me ha o na ho mamella hore Bosebeletsi ba Sechaba bo fetoloe lepatlelo la boikhabi, boikhohomoso le bompoli.

'Muso o kopa ts'oarelo ho Sechaba se soabisitsoeng le ho khopisoa ke boits'oaro bona ho hlokisang Naha le Puso ea sona seriti, 'me o ts'episa ho tiisa letsoho tataisong le khalemong ea Bohlanka.

KHOTSO. PULA. NALA.
